

Dä Vogls Michl

woo a alts Wözborsche Orichinal, un' ä woo üemdrauf mei Gruëßvadde. Jedn Summe ham mir Bum uns gfrääd wennis ghaaßn hod me genn zunna nouch Wözborch. Mei Oupa woo Schutzmaa, hod lang Dienst am Vierröhrnbrunna gstanna un' in Vekeh dirichiert, vorn Grafnegged, dodd woo ä aa lang nachts auf Postn, davoo hod ä sich 'es Rheuma ghuëlt. Wenn na die Nacht zu lang woon is, hoddna manchmol a Freund begleid, dä nië schlouf konnt, übe die alt Maabrück nübe, übe die Löwnbrück zurück, un' hoddna aufgemunderd: Kuëpf huëch, Michl - du mußde ümme voosouch: Godd un' Pflicht - bessres nicht! Un' mid dän Sprüchla auf die Libbn is mei Oupa dann 'in Rest vo dä Nacht um'in Vierröhrnbrunna gekreisld.

Ölla Leut ham 'in Michl gekennt, klaana un' huëcha, die vom Schdaddroud un' die Domherrn hamna midn Voonama aageredt, sogoo dä Bischof hodna ümme die Hand gschüttlt, fast jedn Douch sen sa sich auf dä Hof Strouß begejchnd. Mei Oupa woo seh fromm, woo ümme in dä Meß, kanna vo' die villn Prozessiona hod ä vesäumd, un' ä hod ja nah am Dom un' dä Bischofsresidenz gewohd, ä woo Verwalte vom Paläh Neulobdeborch aufdä Hof Strouß, denn als Schutzmaa hod ä nië genuch vädient. Des Paläh hod an Baro' Wözborch ghöht - dä hod'nselbn Nama wie die Schdadt ghoot, bluëß mid "tz". Dä Michl dofft dinna woh, nejbern Kommandierndn General, wejche dänn vorm Paläh Schildehäusla mit Postn dävoos woon. Aamol isdä Könich Ludwich dä Dritt dinna gewesn, hod beim Baro' un' beim General zu Middouch gässn, un' dou konnt dä Vogls Michl sein Könich vo ganz nah säh. Un' wie dä Könich 'n Michl sei Tochte sicht - mei Mudde - hod ä gfrejcht: Wäm ghöhdn des schöna Maadla? Un' mei Gruëßvadde hod gsocht: Mië. Do hod dä Könich sa an dä Hand genumma un' nauf zor Residenz gführd, wu ä gewohd hod, dodd mußtsa na a Gedecht aufsouch. Mei Gruëßvadde woo auße sich vo' Stolz, un' ölla Leut hamna beglückwünscht. Dä Umgang mid huëcha Herrn hodna a weng derübe hinwechgetröst, daß ä selbe bluëß a klaane Maa woo. Die Arwed bei dä Bolizei un' im Paläh Neulobdeborch woo na nuch nië genuch, ä hod aa gschustert un' Musikstundn gejm, Zidde un' Geichn, un' Schdeno üemdrauf, um sich wie a ächte Wözborsche an eichna klaan Weinkejlle leistn zu könna. Ümme wenn mir odde annera Leut zu Besuch

kumma sen, hod ä dann a boo Boxbeutl raufghuëld. Sei' Mudde hod aa Wei' gemüchd, sie hod ihr klaana Enkelin - mei Mudde - mid nein "Schdachl" genumma un' hod sa mid Brezn gfüdderd, die wu sa nei Wei' gedunkd hod. Mei Ouma ouwe - 'n Oupa sei Fraa - ä hod sa in dä Schönbornkapelln gheierd - hod nex fö' Wei' übrichhood wie ihr Schwiechemudde, sie mußd als Waschfraa am Maa midvedien zum Schutzmannsloo. Sie woo nië vo' Wözborch, un' hod aa ihrn Maa ümme gschimpfd, weil ä su gähn Schöppla getrunkn hod un' su gähn nei die Kerch is. Besonders aa Weihnachtn woos arg. Die Krippn hamna besonders gfalln, die ümme in alla Wözborsche Kerchn woon, dou hod ä sich sälbe jeds Joo aana unde sein Weihnachtsbaam. Un' wenn ä 'in Tannabaam draußn aufdä Hof Strouß am Kronosbrünnla zorechdgschtuzt hod, hou ich na a Stroußnbaabüchla geklaut, bin allaa nouch Grombühl, nei die Zellerau, nouch Hetzfeld gfohn - des woo mei Weihnachtsgschenk an mich selbe.

Obwohl mei Oupa nië vill ghoot hod, konnt ä nië säh, wenn a annre goo nex ghoot hod. Ä hod ümme an die ganz Arma ausgedaalt. Un' deswejche hod ä woll su vill Freund ghoot. Ä woo halt a guude Katholik. Un' deswejche had a Domherr zu na gsocht, als ä na gfrejchd hod: Hochwürdn, maane Sie, ich kumm amol nein Himml? - A Mensch wie Sie kummt nei', Herr Vogel!

Mei Oupa hod ümme gsochd: Wözborch wädd nië bombardiert - dou sen doch bluëß Kerchn - deswejchn bleib ich doua!

Un' ä wollt ja ümme a gruëßa Leich griech. Ouwe als die Bombn aufdie Hof Strouß gfalln sen, konnt dä Vogls Michl nümme rechtzeitig nein Luftschutzkejlle - mä hodna tood aufdä Strouß gfunna, vo' Bombnsplitte' getroffn. Un' kaa gruëßa Leich hods gejm, kaa Freund', kaa Bolizeiabordnung is mitmarschiert, mä hod'n Oupa auf an LKW gschmissn un' na oona Sarch nein Massngroub geworfn.

Ouwe die 'n Vogls Michl gekannt ham, sen sicher, daß ä trotzdem nein Himml kumma is.

